

**■ TRIBUNA POLITICA**

# Penso al futur

DA SILVA SEMADENI,  
CUSSEGLIERA NAZIUNALA

Scenziads din ch'igl è 5 suenter las 12. Il clima surstgauda. Ed ils perscrutaders prognostitgeschan in augment dad ulteriurs dus grads per ils proxims 40 onns. En las Alps è il stgaudament dal clima visibel particularmain bain tar ils glatschers, ils quals sa retiran pass per pass. Jau ma regord bain dals onns sessanta cura ch'il vadretg dal Palü cuntanscheva anc quasi il lai da fermada cun sia color verd smaragd. Oz è il vadretg 400 meters pli aut e tranter la gripa è sa furmà in auter lai. Ed ulteriurs 200 meters plinensi, tar la lieunga dal glatscher actuala, sa furma puspè in nov lai. Ils lais, las cascadas, la transformaziun da la vegetaziun, quai è in svilup interessant. Ma sche nus cuntinuain uschia na datti la fin dal tschientaner pli nagins glatschers, din ils scenziads. En las regiuns alpinas è il stgaudament dal clima pli avanzà che tar la media globala. Las consequenzas las pli privlusas e custusas èn las crudadas da gripa, ma era las boas causadas da grondas quantitads d'aua, sco a Bondo en la Bregaglia. Bliers auters pajais pateschan era, per exempel quels ch'en pertutgads a l'augment dal nivel da la mar u da la setgira u da malauras adina pli frequentas.



Cun buna raschun han 195 pajais acceptà il december 2015 a Paris l'emprim accord universal, giuridicain obligant davart il clima mundial. L'accord prevedeva in plan d'aziun per mintga singul pajais enfin ch'il mund turnava sin la buna via e midadas da clima privlusas pudevan vegnir evitadas. Il stgaudament global sto restar cler e bain sut 2 grads. Era la Svizra ha suttascrit e ratifitgà l'accord da Paris. Jau ves dentant en la cumissiun dal cussegl naziunal quant grev che la realisaziun è. La proposta dal cussegl federal da reveder totalmain la lescha dal CO<sub>2</sub>, gia pac ambiziosa, vegn ulteriuramain mitigada da quels che defendan interess economics a curta vista. Tgi sa sch'ils pajais ch'han suttascrit l'accord da Paris reusseschan ad influenzar effizientamain ils motifs per il stgaudament dal clima.

Tut quai ch'è para en mes egls plitost dramatic, na para betg da preoccupar particularmain la politica grischuna. Tranter ils candidats per la regenza sulettamain in che tematisescha activamain questa gronda sfida, *Peter Peyer*. El vesa quai uschia: «Nus pudain e stuain prestar nossa contribuziun per las finamiras dal clima. L'emprim cun acceptar ils fatgs. Lura cun l'agen agir. Per exempel cun desister consequentamain da combustibels fossils. E cun ina meglra valorisaziun da las resursas aua, sulegl, laina e vent. Ina produenziun d'energia autonoma or da 100 pertschient funtaunas d'energia regenerablas è pussaivel per il Grischun ed in argument da svilup exclusiv. La medema consequenza è necessaria per la promoziun dal traffic public per marganzia, pendularis e giasts. E la meglra promoziun da sanaziuns energeticas dad edifizis vegls na nizzegia betg mo al clima, mabain er al turissem ed a l'economia da construcziun.»

Peter Peyer ha raschun: La midada dal clima represchenta ina da las pli impurtantas sfidas dal tschientaner, ma procura era per novas schanzas. I fess bun sche nus prendes-serius quai.